

Rarau mai ki te kura. Kua rite mātou! Hei aratohu

Hei taunaki tēnei whārangi i a koutou ki te takatū mō te houtanga atu o ngā whānau me ā rātou tamariki ki te kura. Ko te whāinga matua ia, kia poipoia rātou ka whakawhiti ana, ā, kua tautohua ētahi tino pātai hei āwhina i a koutou ki te pēnā. He mea puta ngā pātai nei i ngā kitenga i te rangahau *Kia hoe tahi i te awa kōwhiria o ako*. Hei hāpai i te kaupapa rangahau nei, i kōwhiria te waka me tana haere ki Hawaiki hei tāhuhu kōrero ki te ārahi i ngā mahi. I te tīmatanga he mōkihi kē e tere ana i ngā awa, nāwai rā, ka puta ki te au moana o ako hei waka hourua e whakatehawaiki ana. Kua whakawhāitihia atu ngā pātai ki te pānui whakaahua hei tikiake mā koutou, hei whakairi hoki ki ngā pātū o ō koutou whare ako. Kōrerohia, wānangahia, matapakihia ngā ihirangi o te pānui whakaahua, ka whakautu ai i ngā pātai.

Tuia ki tēnā, kua whakarāpopotohia mai i konei ngā urupare o ngā whānau mō tā rātou i whakapuaki ai mō ngā āhuatanga matua ki a rātou nā reira i māia ai, i rarau ai, ka mutu i tau ai. Koinei ā rātou hiahia:

- Te whai hononga (**whanaungatanga**) ki waenga i te whānau kura, kaiako mai, mātua mai
- Kia nui tonu te ako mō ngā **kaupapa ārahi i te kura**.
- Te rongoi i te tautoko i tā rātou whai i te **reo Māori**.
- Te kite i tētahi mahere mārama mō te **tukanga whakawhiti**.
- Te wānanga tahi, me tuku, me **whakautu tahi i ngā pātai**.
- Te mōhio me pēhea rātou e **tautoko i ā rātou tamariki** kia rite.

E akiaki ana i a koutou ki te āta whakaaro ki ngā tūtohu a ngā mātua, me te whai i ā koutou anō urupare ki tā rātou i kī ai. He aha ngā rauemi motuhake ka taea e koutou te waihanga hei āwhina i ngā whānau? Kei te pānui whakaahua he awenga whakaaro, kāore hoki i kō atu i ngā kōrero ka puta i ngā whānau tonu ki a koutou. Kei mahue te tino whaihua o te toro atu ki ngā wāhi ako e renarena ai te taura here tāngata, mā te pērā hoki e rarau ai a ngākau manawarū. Irā te ātaahua o te mahi tahi e riro ai he hua ki te katoa. Te Kōhanga Reo kei runga, Te Kura Kaupapa Māori kei runga! Hikihikitia! Hapahapainga!



Te whakapātari

Wāhi whakamahere - Kei hea tātou ināianeī? Ka ahu atu ki hea ā muri atu nei?



Te whakapātari

Wāhi whakamahere - Kei hea tātou ināianeī? Ka ahu atu ki hea ā muri atu nei?

